

O Consello de Forzas Políticas Galegas ao Povo Galego

As organizacións abaixo firmantes coidan que é imposible acabar en Galicia unha Sociedade verdadeiramente democrática sen unha estratexia unitaria que formule, cara a ruptun, democrática unha alternativa política autenticamente galega, é dicir, pensada e formulada desde Galicia e desenvolada por e para o Povo Galego. Sexan cuáis foran os procesos políticos concretos inmediatos que incidan no País Galego, e aínda sen esquecermos o papel condicionante que desempeña o Estado español unitario, colonialista e hoxe por hoxe institucionalmente antidemocrático e feixista, Galicia precisa de unha estratexia política propia encamiñada á ruptura que abra o vieiro de Liberdade e da Xusticia para o noso Povo.

Esa estratexia, pola súa propia índole e mais polos obxeivos que está chamada a acadar, non pode ser elaborada e conducida por calquera Forzas Políticas presentes en Galicia.

Somente aquelas que dispoñan de autonomía indispensable e que, ademais, estexan dispostas a pór esa autonomía ao servizo desa estratexia de alternativa democrática galega, poden estar en condicións obxetivas valedoiras para elaborala e lle dar vida na praxis política.

Compre, no actual intre político, que as Forzas Políticas Galegas que reunan esas condicións creen sen demora o órgano unitario capaz de elaborar a devandita alternativa estratéxica para o noso Povo. Velai por qué as organizacións políticas abaixo firmantes crean o CONSELLO DE FORZAS POLITICAS GALEGAS como órgano unitario que traballará pola instauración da Democracia en Galicia, rexeitando calquer caste de sistema político que non proceda da soberanía popular e que nos estexa fundamentado nos seus intereses.

O CONSELLO DE FORZAS POLITICAS GALEGAS entende que a ASSEMBLEIA NACIONAL POPULAR GALEGA xa é unha alternativa democrática non partidaria de institucionalización dun poder popular galego, e por iso, desde este intre, fai recoñecemento público do seu apoio á mesma. Mas, non por iso estima que sexa menos necesaria a plataforma interpartidaria que xurde coa creación do CONSELLO DE FORZAS POLITICAS GALEGAS.

II

O CONSELLO DE FORZAS POLITICAS GALEGAS considera presupostos básicos e imprescindíbeis para a apertura do proceso democrático en Galicia os seguintes:

1. Libre autodeterminación á que Galicia ten dereito como Povo.
2. Goberno Provisorio Galego que encetará o proceso constituinte e convocará oportunamente eleccións libres, adoptando previamente toda clase de medidas necesarias para garantir a defensa dos intereses do Povo Galego.
3. A implantación inmediata das liberdades democráticas de expresión, xuntanza, asociación, sindicación, manifestación, folga e cantos dereitos do home se recoñecen nas Declaracións internacionais, así como a amnistia para os presos e esiliados políticos.
4. A adopción de medidas políticas, económicas, sociais e culturais que garanten singularmente os intereses das clases traballadoras e do Povo Galego en xeral, atraves do pertinente programa que o Goberno Provisorio há pór en práctica.
5. O recoñecemento oficial do idioma galego a todos os efectos, establecéndose a normalización da lingua a todos os niveis.
6. O novo artellamento do Estado español, de xeito que o Goberno Provisorio Galego ha participar no proceso constituinte que artelle un Estado Federal ou Confederal, no que as atribucións e competencias queden garantizadas en plano de igualdade.

III

O CONSELLO DE FORZAS POLITICAS GALEGAS asumirá a representación da alternativa democrática galega, sen perxuício das alianzas que existan con diferentes organizacións políticas dos Povos do Estado español, que non poderán atentar contra os principios deste Pacto.

O CONSELLO DE FORZAS POLITICAS GALEGAS dará acollida como membros seus ás organizacións políticas partidarias dispostas a asumir a alternativa estratéxica que representa e que, en consecuencia, suscriban os principios deste Pacto político, comprometéndo-se a observalos na praxis democrática.

O CONSELLO DE FORZAS POLITICAS GALEGAS funcionará mediante unha Comisión Permanente con participación paritaria das organizacións membro.

A Comisión Permanente elaborará os pertinentes Comunicados e Decleracións políticas ao país.

A CONSELLO DE FORZAS POLITICAS GALEGAS adoptará as súas decisións por unanimidade.

Galicia, 5 de Xaneiro de 1976.

PARTIDO GALEGO SOCIAL DEMOCRATA
PARTIDO SOCIALISTA GALEGO
UNION DEMOCRATICA GALEGA (Prexente de ratificación)
UNION DO POVO GALEGO